

Hormati keputusan pemilihan MPP – Khaled

KUALA LUMPUR 22 Feb. – Kementerian Pengajian Tinggi meminta semua pihak agar menghormati keputusan pemilihan Majlis Perwakilan Pelajar Sesi 2010/2011 di institusi pengajian tinggi awam (IPTA) yang berlangsung semalam dan hari ini.



Menteri Pengajian Tinggi, Datuk Seri Mohamed Khaled Nordin (gambar) berkata, semua pi-

hak perlu memberikan kerjasama padu kepada barisan kepimpinan MPP yang baru dipilih tersebut.

“Kementerian sentiasa menyokong dan bersedia membantu kepimpinan mahasiswa dalam menajayakan aktiviti, program dan perancangan MPP di universiti masing-masing,” katanya dalam ke-

nyataan akhbar di sini hari ini.

Menurut Mohamed Khaled, ke-

menterian menyifatkan pemilihan MPP kali ini berlangsung dengan baik meskipun berlaku beberapa insiden kurang menyenangkan di beberapa universiti.

“Bagaimanapun, kementerian menyifatkan ia tidak mengganggu demokrasi dan membuktikan proses serta semangat demokrasi di dalam kampus masih subur dan dinamik,” katanya.

Beliau turut mengucapkan tahniah kepada semua pemenang dan mengharapkan kesemua mereka melaksanakan tanggungjawab dan amanah

dengan sebaik mungkin.

“Kemenangan bukanlah sebagai perkara yang perlu dimegahkan sebaliknya ia perlu digalas dengan penuh amanah dan keinsafan.

“Kemenangan itu juga menjadi tiket kepada mereka untuk berbakti dan menyumbang kepada pembangunan sama ada di peringkat universiti, masyarakat atau negara.

“Sementara itu, kepada yang kurang bernasib baik, tahniah juga diucapkan atas semangat dan iltizam yang ditunjukkan. Anggaphlah keka-

lahan ini bukan sebagai penamat untuk terus berbakti kepada universiti dan masyarakat,” katanya.

Mohamed Khaled turut mengucapkan tahniah kepada semua IPTA kerana berjaya melaksanakan proses pemilihan MPP kali ini dengan lancar dan sempurna.

“Sebanyak 19 IPTA mengadakan pemilihan MPP dengan 12 IPTA semalam dan yang lain berlangsung hari ini.

“Universiti Malaysia Perlis (UniMAP) dijadual mengadakan pemilihannya pada 24 Februari ini,” katanya.